

卷
念
伍
參

第九本

新
增
全圖足本醫宗金鑑

上海

局書新啟
行發



御纂醫宗金鑑卷二十三

訂正仲景全書金匱要略註下之二

婦人妊娠病脈證並治第二十

師曰婦人得平脈陰脈小弱其人渴不能食無寒熱名妊娠桂枝湯主之於法六十日當有此證設有醫治逆者却一月加吐下者則絕之〔註〕婦人經斷得平脈無寒熱則內外無病其人渴不能食乃妊娠惡阻之漸也故陰脈雖小弱亦可斷為有孕但惡阻於法六十日當有此證設醫不知是孕而治逆其法却一月卽有此證也若更加吐下者則宜絕止醫藥聽其自愈可也然脈平無寒

熱用桂枝湯與妊娠渴不能食者不合且文義斷續不純其中必有脫簡〔集〕

〔註〕徐彬曰平脈者不見病脈一如平人也陰脈小弱者脈形小不大軟弱無力非細也諸脈既平而獨下焦陰脈微見不同是中上二焦無病乃反見渴不

能食之證則渴非上焦之熱不能食亦非胃家之病矣少陽有嘿嘿不欲食之證今無寒熱亦無少陽表證可疑矣是渴乃陰火上熾不能食乃惡心阻食陰脈小乃胎元蝕氣故曰名妊娠也 李廷曰此節病證卽妊娠惡阻是也寸為陽脈主氣尺為陰脈主血陰脈小弱者血不足也血以養胎則液竭而渴又脾

為坤土厚德載物胎氣賴以奠安不能食者脾氣弱也凡有他病而渴不能食者脈必不平而有寒熱今雖不能食反得平脈又無寒熱故主妊娠

桂枝湯方

見下利中

婦人宿有癥病經斷未及三月而得漏下不止胎動在臍上者為癥瘕害妊娠六月動者前三月經水利時胎也下血者後斷三月衃也所以血不止者其癥不去故也當下其癥桂枝茯苓丸主之〔註〕經斷有孕名曰妊娠妊娠下血則為漏下婦人宿有癥瘕之疾而育胎者未及三月而得漏下下血不止胎動不安者此為癥瘕害之也已及六月而得漏下下血胎動不安者此亦癥瘕害之也然有血衃成塊者以前三月經雖斷血未盛胎尚弱未可下其癥瘕也後三月血成衃胎已強故主之桂枝茯苓丸當下其癥瘕也此示人妊娠有病當攻病之義也此條文義不純其中必有闕文姑存其理可也〔集註〕婁全善曰凡胎動多當臍今動在臍上者故知是癥也程林曰此有癥病而懷胎者雖有漏血不止皆癥瘕之為害非胎動胎漏之證下其癥瘕妊娠自安此內經所謂有故無殞亦無殞也方氏曰胎動胎漏皆下血而胎動有腹痛胎漏無腹痛故胎動宜行氣胎漏宜清熱魏荔彤曰胎與衃之辨當於血未斷之前三月求

之前三月之經水順利則經斷必是胎前三月有曾經下血者則經斷必成

桂枝茯苓丸

桂枝

茯苓

牡丹 去心

桃仁 去皮

芍藥 各等分

以上五味末之煉蜜和丸如兔屎大每日食前服一九不止

加至三九

婦人懷妊六七月脈弦發熱其胎愈脹腹痛惡寒者少腹如扇所以然者子藏

開故也當以附子湯溫其藏

方未見

〔註〕

婦人懷妊六七月脈弦發熱似表證也

若其胎愈脹腹痛惡寒而無頭痛則非表證也少腹如扇狀其惡寒如扇風之

侵襲也所以然者因其人陽虛子藏開寒邪侵入故用附子湯溫子藏而逐寒

但方缺文亦不純必有殘缺

〔集註〕

程林曰胎脹腹痛亦令人發熱惡寒少腹如

扇者陰寒勝也妊娠陰陽調和則胎氣安今陽虛陰盛不能約束胞胎故子藏

為之開也附子湯用以溫經

李廷曰按子藏即子宮也臍下三寸為關元關

元左二寸為胞門右二寸為子戶命門為女子繫胞之處非謂命門即子藏也

蓋命門是穴名在腰後兩腎中附脊骨之第十四椎兩旁經今文明說少腹如

扇者子藏開則子藏在少腹明矣豈有在少腹者而反謂其在脊後者乎此誤

也尤怡曰脈弦發熱有似表證而乃身不痛而腹反痛背不惡寒而腹反惡

寒甚至少腹陣陣作冷若或扇之者其所以然者子藏開不能闔而風冷之氣乘之也夫藏開風入其陰內勝則其脈弦為陰氣而發熱且為格陽矣胎脹者熱則消寒則脹也附子湯方未見然溫裏散寒之意概可推矣○師曰婦人有漏下者有半產後因續下血都不絕者有妊娠下血者假令妊娠腹中痛為胞阻膠艾湯主之註五六月墮胎者謂之半產婦人有漏下下血者疾至五六月墮胎而下血不絕者此癥瘕之害也若無癥瘕下血惟腹中痛者則為胞阻胞阻者胞中氣血不和而阻其化育也故用芎歸膠艾湯溫和其血血和而胎育也集註程林曰漏下者妊娠經來脈經以陽不足謂之激經也半產者以四五月墮胎墮胎必傷其血海血因續下不絕也若妊娠下血腹中痛為胞阻則用膠艾湯以治尤怡曰婦人經水淋瀝及胎產前後下血不止者皆衝任脈虛而陰氣不能守也是惟膠艾湯能補而固之

芎歸膠艾湯方 芎藭

阿膠

甘草各二兩

艾葉

當歸各三兩

芍藥四兩

乾地黄

以上七味以水五升清酒三

升合煮取三升去滓內膠令消盡溫服一升日三服不差更作

婦人懷娠腹中疝痛當歸芍藥散主之按妊娠腹中急痛用此方未詳其義

必是脫簡不釋

當歸芍藥散方 當歸 三兩

芍藥 一斤

茯苓 四兩

白朮 四兩

澤瀉 半斤

芎藭 半斤

以上六味杵為散取方寸匕酒和日三服

妊娠嘔吐不止乾薑人參半夏丸主之〔註〕妊娠嘔吐謂之惡阻惡阻者謂胃

中素有寒飲惡阻其胎而妨飲食也主之以乾薑去寒半夏止嘔惡阻之人日日

嘔吐必傷胃氣故又佐人參也〔集註〕程林曰寒在胃脘則令嘔吐不止故用

乾薑散寒半夏生薑止嘔人參和胃半夏乾姜能下胎婁全善云余治妊娠病

累用半夏未嘗動胎亦有故無殞之義臨病之工何必拘泥 尤怡曰此益虛

溫胃之法為妊娠中虛而有寒者設也夫陽明之脈順而下行者也有寒則逆

有熱亦逆逆則飲必從之而妊娠之體精凝血聚每多蘊而成熱者矣按外臺

方青竹茹橘皮半夏各五兩生薑茯苓各四兩麥冬人參各三兩為治胃熱氣

逆嘔吐之法可補仲景之未備也

乾薑人參半夏丸方

乾薑

人參 各一兩

半夏 二兩

以上三味末之以生薑汁糊為丸如梧子大飲服十九日三服

妊娠小便難飲食如故當歸貝母苦參丸主之〔按〕方證不合必有脫簡不釋

丁王金匱要略卷下之二
二母故所書為行

當歸貝母苦參丸方

當歸

貝母

苦參

各四兩

以上三味末之煉蜜為丸如小豆大飲服三丸加至十丸

妊娠有水氣身重小便不利瀝浙惡寒起即頭眩葵子茯苓散主之

註妊娠

外有水氣則浮腫瀝浙惡寒水盛貯於肌膚故身重內有水氣則小便不利水盛阻遏陽氣上升故起即頭眩也用葵子茯苓者是專以通竅利水為主也

葵子茯苓散方

葵子一升

茯苓三兩

以上二味杵為散飲服方寸

匕日三服小便利則愈

婦人妊娠宜常服當歸散主之

註妊娠無病不須服藥若其人瘦而有熱恐

耗血傷胎宜常服此以安之

集註尤怡曰妊娠最慮熱傷故於芎歸芍藥養

血之中用黃芩清熱佐白朮和胃也震亨稱黃芩白朮為安胎聖藥夫芩朮非

能安胎者也去其溼熱其胎自安耳

當歸散方

當歸

黃芩

芍藥

芎藭

各一斤

白朮

半斤

以上五味杵為散酒飲服方寸匕日再服妊娠常服即易產

胎無苦疾產後百疾悉主之

妊娠養胎白朮散主之

註

妊娠婦人肥白有寒恐其傷胎宜常服此

聚註

尤怡曰妊娠傷胎有因熱者亦有因寒者隨人藏氣之陰陽而各異也當歸散正治熱之劑白朮散君白朮和胃臣川芎調血使蜀椒去寒佐牡蠣安胎也則正治寒之劑也仲景並列于此其所以昭示後人者深矣

白朮散方

白朮

芎藭

蜀椒三分
去汗

牡蠣

以上四味杵為散酒服一錢匕日三服夜一服但苦痛加芎藥心下毒痛倍加芎藭心煩吐痛不能食飲加細辛一兩半夏大者二十枚服之後更以醋漿水服之若嘔以醋漿水服之復不解者小麥汁服之已後渴者大麥粥服之病雖愈服之勿置

婦人傷胎懷身腹滿不得小便從腰已下重如有水氣狀懷身七月太陰當養不養此心氣實當刺瀉勞宮及關元小便微利則愈按文義未詳此穴刺之落胎必是錯簡不釋

婦人產後病脈證並治第二十一

問曰新產婦人有三病一者病瘧二者病鬱冒三者大便難何謂也師曰新產血虛多汗喜中風故令病瘧亡血復汗寒多故令鬱冒亡津液胃燥故大便難註新產之婦畏其無汗若無汗則榮衛不和而有發熱無汗似乎傷寒表

病者但舌無白胎可辨也故喜其有汗而又恐汗出過多表陽不固風邪易入而為項強腰背反張之瘕病也新產之婦畏血不行若不行則血瘀於裏而有發熱腹痛似乎傷寒裏病者但以舌無黃胎可辨也故喜其血下而恐血下過多陰亡失守虛陽上厥而為昏冒不省合目汗出之血暈也新產雖喜其出汗喜其血行又恐不免過傷陰液致令胃乾腸燥而有潮熱譫語大便艱難似乎陽明胃家實者故仲景於產後首出三病不只为防未然之病而更為辨已然之疑也昏冒而曰鬱冒者謂陰陽虛鬱不交通而致冒也

集註

尤怡曰瘕

筋病也血虛汗出筋脈失養風入而益其勁也鬱冒神病也亡陰血虛陽氣遂厥而陰復鬱之則頭眩而目瞽大便難者液病也胃藏津液滲灌諸陽亡津液胃燥則大腸失其潤而便難也三者不同其為亡血傷津則一也

產婦鬱冒其脈微弱不能食大便反堅但頭汗出所以然者血虛而厥厥而必冒冒家欲解必大汗出以血虛下厥孤陽上出故頭汗出所以產婦喜汗出者亡陰血虛陽氣獨盛故當汗出陰陽乃復大便堅嘔不能食小柴胡湯主之病解能食七八日更發熱者此為胃實大承氣湯主之

註

此承上條互詳其義

以明其治也產婦昏冒脈微弱者是氣血俱虛應得之診也不能食者是胃氣

未和應得之候也大便反堅者是腸胃枯乾應得之病也究之鬱冒所以然者由血虛則陰虛陰虛則陽氣上厥而必冒也冒家欲解必大汗出者是陽氣鬱得以外洩而解也故產婦喜汗出也由此推之血瘀致冒解必當下血是陰氣鬱得以內輸而解也最忌者但頭汗出則為陰亡下厥孤陽上出也大便堅嘔不能食用小柴胡湯必其人舌有胎身無汗形氣不衰者始可故病得解自能食也若有汗當減柴胡無熱當減黃芩嘔則當倍薑半虛則當倍人參又在臨證之變通也大便秘七八日更發熱用大承氣湯亦必其人形氣俱實胃強能食者始可也若氣弱液乾因虛致燥難堪攻下者則又當內用元明粉以軟堅燥外用諸導法以潤廣腸緩緩圖之也

集註

尤怡曰鬱冒雖有客邪而其本

則為裏虛故其脈微弱也嘔不能食大便反堅但頭汗出津液上行不下逮之象所以然者亡陰血虛孤陽上厥而津液從之也厥者必冒冒家欲解必大汗出者陰陽乍離故厥而冒及陰陽復通汗乃大出而解也產婦新虛不宜多汗而此反喜汗出者血去陰虛陽受邪氣而獨盛汗出則邪去陽弱而後與陰相和所謂損陽而就陰是也

小柴胡湯

見嘔吐中

大承氣湯 見痙病中

產婦腹中疝痛當歸生薑羊肉湯主之並治腹中寒疝虛勞不足 註產後暴

然腹中急痛產後虛寒痛也主之當歸生薑羊肉湯者補虛散寒止痛也並治

虛勞不足寒疝腹痛者亦以其虛而寒也 集註程林曰產後血虛有寒則腹

中急痛內經曰味厚者為陰當歸羊肉味厚者也用以補產後之陰佐生薑以

散腹中之寒則疝痛自止夫辛能散寒補能去弱三味辛溫補劑也故並主虛

勞寒疝 魏荔彤曰妊娠之疝痛胞阻於血寒也產後腹中疝痛者裏虛而血

寒也一阻一虛而治法異矣

當歸生薑羊肉湯方 見寒疝中

產後腹痛煩滿不得卧枳實芍藥散主之 註產後腹痛不煩不滿裏虛也今

腹痛煩滿不得卧裏實也氣結血凝而痛故用枳實破氣芍藥調腹痛枳實炒

令黑者蓋因產婦氣不實也並主癰膿亦因血為氣凝久而腐化者也佐以麥

粥恐傷產之胃也 集註尤怡曰產後腹痛而至煩滿不得卧知血鬱而成熱

且下病而礙上也與虛寒疝痛不同矣

枳實芍藥散方 枳實 芍藥 等分 勿炒 勿過 以上二味杵為散服方寸匕

日三服並主癰膿以麥粥下之

師曰產婦腹痛法當以枳實芍藥散假令不愈者此為腹中有乾血著臍下宜下瘀血湯主之亦主經水不利

〔註〕

產婦腹痛屬氣結血凝者枳實芍藥散以

調之假令服後不愈此為熱灼血乾著於臍下而痛非枳實芍藥之所能治也宜下瘀血主之下瘀血湯攻熱下瘀血也並主經水不通亦因熱灼血乾故也下瘀血湯方

大黃

三兩

桃仁

二十枚

蟅蟲

二十枚
熬去足

以上三味末

之煉蜜和為四丸以酒一升煎一丸取八合頓服之新血下如豚肝

〔集註〕

程林曰蟅蟲主開血閉大黃主攻瘀血桃仁主破死血

產後七八日無太陽證少腹堅痛此惡露不盡不大便煩躁發熱切脈微實再倍發熱日晡時煩躁者不食食則譫語至夜即愈宜大承氣湯主之熱在裏結在膀胱也〔按〕熱在裏結在膀胱也之八字當在本條上文惡露不盡之下未有大承氣湯下膀胱血之理必是傳寫之譌再倍二字當是衍文〔註〕無太陽證無表證也少腹堅痛有裏證也因其產後七八日有畜血裏證而無太陽表證則可知非傷寒太陽隨經瘀熱在裏之病乃產後惡露未盡熱結膀胱之病當主以下瘀血可也若不大便不食譫語煩躁發熱日晡更甚至夜即愈此為胃實之

病非惡露不盡之病以其日晡更甚至夜即愈則可知病不在血分而在胃也故以大承氣湯下之

集註

李紘曰此一節具兩證在內一是太陽畜血證

是陽明裏實證因古人文法錯綜故難辨也無太陽證謂無表證也少腹堅痛者以肝藏血少腹為肝經部分故血必結於此則堅痛亦在此此惡露不盡是為熱在裏結在膀胱此太陽畜血證也宜下瘀血若不大便煩躁脈實證語者陽明裏實也再倍發熱者熱在裏蒸蒸發於外也陽明旺於申酉戌日晡是陽明向旺時故煩躁不能食病在陽而不在陰故至夜則愈此陽明府病也宜大承氣湯以下胃實

按

傷寒論曰陽明病不能食攻其熱必噦以胃中虛冷故也又云發熱者尤當先解表乃可攻之況在產後豈可妄議攻下哉必認證果真方可用此

產後風續之數十日不解頭微痛惡寒時時有熱心下悶乾嘔

汗出雖久陽旦證續在者可與陽旦湯

註

產後續感風邪數十日不解頭微

痛惡寒時熱汗出表未解也雖有心下悶乾嘔之裏但有桂枝證在可與陽旦

湯解表可也陽旦湯即桂枝湯加黃芩陽旦證即桂枝證也

集註

沈明宗曰

上下三條乃產後感冒證也世謂產後氣血兩虛不論外感內傷皆以補虛為

主而仲景拈傷寒中之風傷衛發熱仍以表裏陰陽去邪為訓故云產後中風

數十日不解頭微痛惡寒時時有熱汗出乃太陽表未解也但心下悶乾嘔是外邪入於胸中之裏太陽表裏有邪謂之陽旦證故以桂枝湯加黃芩而為陽旦湯以風邪在表故用桂枝解肌邪入胸膈之間當以清涼解其內熱故加黃芩正謂不犯其虛是益其餘不補正而正自補不驅邪而邪自散斯為產後感冒入神之妙方也奈後人不察其理反謂芍藥酸寒能伐生生之氣桂枝辛熱恐傷其血棄而不用以致病劇不解只因未窺仲景門牆耳故千金方以此加飴糖當歸為當歸建中湯治產後諸虛或外感病推仲景之意嘗以此湯加減出入治產後諸病屢獲神效故表出之 尤怡曰夫審證用藥不拘日數表裏既分汗下斯判上條裏熱成實雖產後七八日與大承氣而不傷於峻此條表不解雖數十日之久與陽旦湯而不慮其散非通於權變者未足語此也

陽旦湯方

即桂枝湯內加黃芩
枝桂湯方見下利中

產後中風發熱面正赤喘而頭痛竹葉湯主之 按 產後中風之下當有病瘕

者之三字始與方合若無此三字則人參附子施之於中風發熱可乎而又以竹葉名命者何所謂也且方內有頸項強用大附子之文本篇有證無方則可知並有脫簡 註 產後汗多表虛而中風邪病瘕者主之竹葉湯發散太陽陽

明兩經風邪用竹葉為君者以發熱面正亦有熱也用人參為臣者以產後而喘不足也頸項強急風邪之甚故佐附子嘔者氣逆故加半夏也集註程林曰產後血虛多汗出喜中風故令病瘕今證中未至背反張而發熱面赤頭痛亦風瘕之漸也

竹葉湯方

竹葉一把

葛根三兩

防風一兩

桔梗

桂枝

人參

甘草各一兩

附子一枚

大棗十五枚

生薑三兩

以上十味以水一斗煮取二升半分溫三服溫覆使汗出頸

項強用大附子一枚破之如豆大煎藥揚去沫嘔者加大半夏半升洗

婦人乳中虛煩亂嘔逆安中益氣竹皮大丸主之按此條文義證藥未詳

竹皮大丸方

生竹茹二分

石膏二分

桂枝一分

甘草七分

白薇一分

以上五味末之棗肉和丸彈子大以飲服一九日二夜二服

有熱者倍白薇喘者加柏實一分

集解

濟陰綱目云中虛不可用石膏煩亂不可用桂枝此方以甘草七分配

眾藥六分又以棗肉為丸仍以一丸飲下可想其立方之微用藥之難審虛實之不易也仍飲服者尤慮夫虛虛之禍耳用是方者亦當深省產後下利及

虛極白頭翁加甘草阿膠湯主之按此條文義證藥不合不釋

白頭翁加甘草阿膠湯方

白頭翁

甘草

阿膠

秦皮

黃連

藥皮

以上六味以水七升煮取二

升半內膠令消盡分溫三服

婦人雜病脈證並治第二十二

婦人之病因虛積冷結氣為諸經水斷絕至有歷年血寒積結胞門寒傷經絡凝堅在上嘔吐涎唾久成肺癰形體損分在中盤結繞臍寒疝或兩脇疼痛與臟相連或結熱中痛在關元脈數無瘡肌若魚鱗時著男子非止女身在下來多經候不勻令陰掣痛少腹惡寒或引腰脊下根氣衝氣急痛膝脛疼煩奄忽弦冒狀如厥癰或有憂慘悲傷多嗔此皆帶下非有鬼神久則羸瘦脈虛多寒三十六病千變萬端審脈陰陽虛實緊弦行其鍼藥治危得安其雖同病脈各異源子當辨記勿謂不然按此條為婦人雜病提綱當冠篇首以揭病情在下來多之來字當是未字本條皆經水斷絕之病若係來多則與上文不合與下文經候不勻亦不合又本條內有此皆帶下一句當在非有鬼神之下文義相屬是傳寫之謬註此條為婦人諸病綱領其病之所以異於男子者以其有月經也

其月經致病根源則多因虛損積冷結氣也三者一有所感皆能使經水斷絕至有歷年寒積胞門以致血凝氣結而不行者先哲云女子以經調為無病者經不調則變病百出矣以下皆言三者阻經之變病其變病之不同各因其人之臟腑經絡寒熱虛實之異也如寒外傷經絡其人上焦素寒則凝堅在上故上焦胸肺受病也形寒傷肺則氣滯阻飢故嘔吐涎唾也若其人上焦素熱寒同其化久則成熱熱傷其肺故成肺癰而形體損瘦也若其中焦素寒則在中盤結故繞臍疝痛也或兩脇疼痛是中焦之部連及肝臟故也或其中焦素熱則不病寒疝而病熱結於中矣中熱故不能為寒疝而繞臍之痛仍在關元也其人脈數當生瘡若無瘡則熱必灼陰皮膚失潤故肌粗若魚鱗也然此嘔吐涎唾寒疝疼痛肌若魚鱗等病亦時著男子非止女子病也在下未多謂經候不勻而血不多下也邪侵胞中乃下焦之部故病陰中掣痛少腹惡寒也或痛引腰脊下根氣街急痛腰脊疼煩皆胞中衝任為病所必然也或痛極奄忽眩冒狀如厥癰亦痛甚之常狀也若其人或有憂慘悲傷多嗔之遇而見此眩冒厥癰之證實非有鬼神也凡此胞中衝任血病皆能病帶故諺曰十女九帶也然帶下病久津液必傷形必羸瘦診其脈虛審其多寒豈止病此三十六病